

Privredna odjeljenja mogu pomoći kod privlačenja investicija u BiH i otvoriti nova radna mjesta

Šesnaest novo-formiranih privrednih odjeljenja pri Općinskim i Osnovnim sudovima širom BiH su ključni elemenat u privlačenju investicija, neophodnih za otvaranje novih radnih mjesta, rekao je danas prvi zamjenik visokog predstavnika Donald Hays tokom sastanka koji su direktor misije USAID-a Howard Sumka i on imali sa predsjednicom Općinskog suda u Sarajevu Aidom Salčinović-Kuljanin, te pet sudija Privrednog odjeljenja pri tom sudu.

«Privredna odjeljenja bi trebala vratiti BiH ponovo u igru,» rekao je ambasador Hays; «Ta odjeljenja su sastavni dio projekta Posao i pravda, te bitan elemenat u osiguranju učinkovitog i neovisnog pravosuđa koje služi građanima Bosne i Hercegovine.»

Prvi zamjenik visokog predstavnika je konstatirao da u pregovorima sa potencijalnim investitorima u BiH, strah od blokiranja u beskonačnim rješavanjima privrednih parnica – slučajeva čije rješavanje traje godinama – je u najvećem broju slučajeva označen kao jedan od glavnih destimulativnih faktora za investitore koji žele uložiti novac u ovu zemlju te tako otvoriti nova radna mjesta. «Sa ovog suda treba otići poruka da će zabrinutosti potencijalnih investitora biti razmatrane i da rješenja postoje,» rekao je Hays.

Privredna odjeljenja okupljaju sudije i pravnike koji su specijalizirali privredno pravo i koji privredne slučajeve tretiraju kao prioritet. Privredno odjeljenje u Sarajevu je

formirano krajem 2003. godine. Pored odjeljenja u Sarajevu, do marta 2004. godine privredna odjeljenja su formirana pri općinskim ili osnovnim sudovima u Banjaluci, Bihaću, Bijeljini, Brčkom, Doboju, Goraždu, Livnu, Mostaru, Orašju, Sokocu, Širokom Brijegu, Tuzli, Trebinju, Zenici i Travniku.

U septembru 2003. godine, USAID je pokrenuo projekat kojem je cilj da obezbijedi obuku i tehničku pomoć privrednim odjeljenjima. USAID će u ovaj projekat investirati oko 10 miliona USD tokom naredne tri godine, radeći sa lokalnim partnerima kao što su sudije, povjerenici, procjenitelji, kreditori, advokati, službenici, i drugi.

«Uspostavljanje privrednih odjeljenja je važan korak prema osiguranju okruženja koje je ohrabrujuće za kreditiranje i investiranje,» rekao je direktor misije USAID-a Sumka. «Poduzetnici trebaju vjerovati da će sudovi nesporazume riješiti pošteno, na očekivan način i brzo, kako bi se lakše bavili biznisom u Bosni i Hercegovini.»